

Oslobođenje, 25/04/2007

# Ured disciplinskog tužioca **Neosnovane** **pritužbe "Doma"**

Ured disciplinskog tužioca okončao je aktivnosti na provjeri pritužbi Udruženja građana za zaštitu nosilaca stanarskog prava na nacionaliziranim i privatnim stanovima *Dom* o postupanju Općinskog suda Sarajevo u postupku po zahtjevu za uknjižbu prava vlasništva na otkupljenim nacionaliziranim stanovima, saopćeno je u utorak iz Ureda disciplinskog tužioca.

U sveobuhvatnoj istrazi je utvrđeno da je Općinski sud u Sarajevu postupao na temelju relevantnih propisa u vezi sa zahtjevima za upis vlasništva nad otkupljenim nacionaliziranim stanovima, te da ne postoje dokazi da je predsjednik ovog suda izdao usmenu ili pisanu naredbu da se obustavi postupanje po zahtjevima građana za upis vlasništva na otkupljenim nacionaliziranim stanovima.

Također je utvrđeno da su svi do sada obrađeni zahtjevi podnosioca riješeni negativno (ukupno 102 do 3. aprila 2007. godine), pa samim tim nije utvrđeno ni da su neki zahtjevi riješeni pozitivno, kao što se tvrdi u pritužbi UG *Dom*.

Na osnovu ovih činjenica, Ured disciplinskog tužioca je zaključio da ne postoje osnovi za daljnje postupanje u pogledu eventualne disciplinske odgovornosti predsjednika Općinskog suda Sarajevo, stoji u saopćenju.